

Тасбех, ҳамд, такбир ва таҳлилнинг фазли (1-қисм)



20:25 / 10.05.2018 5143

Аллоҳ таоло:

«Осмонлардаги ва ердаги нарсалар Аллоҳни поклаб ёд этди. У Азийз ва Ҳакиймдир», деган («Ҳадид» сураси, 1-оят).

Тасбех айтиш улуғлаш, поклаш, нуқсонсиз деб ёд этиш каби маъноларни ўзида мужассамлаштирган.

Аслида, тасбех айтиш «Субҳаналлоҳ» калимасини такрорлаш билан бўлади. Борлиқдаги ҳамма нарса ўзига хос йўл билан Аллоҳга тасбех айтади. Биз фақат инсоннинг тасбехини англаймиз, бошқаларнинг тасбехини англамаймиз. Бу ҳақиқат «Исро» сурасида зикр қилинган.

Бошқа сураларда ҳам шунга ўхшаш хабарлар бор.

Имом Муслим ривоят қилган ҳадисда Пайғамбаримиз соллаллоҳу алайҳи васаллам:

«Янги Пайғамбар бўлган пайтимда Маккада бир тош менга салом берар эди. Ҳозир ҳам уни танийман», деганлар.

Имом Термизий қилган ривоятда ҳазрати Али каррамаллоҳу важҳаҳу:

«Расулуллоҳ соллаллоҳу алайҳи васаллам билан Макканинг четига чиқдик, кўринган ҳар бир тош, ҳар бир тоғ у кишига «Ассалому алайка, яа Расулуллоҳ» дер эди», деб айтганлар.

Имом Бухорийнинг ривоятларида Анас ибн Молик розияллоҳу анҳу:

«Расулуллоҳ соллаллоҳу алайҳи васаллам бир тўнканинг устида хутба айтар эдилар. У зотга минбар қилиб берилгач, унга чиқиб хутба айтаётганларида, тўнка туянинг овозига ўхшаш овоз чиқариб, йиғлади. Расулуллоҳ тушиб, уни ушлаган эдилар, жим бўлиб қолди», деганлар.

Оятнинг сўнгидаги Аллоҳнинг сифатларидан иккитаси зикр қилинади.

Биринчиси – «Азийз».

Азизлик бир сифат бўлиб, ўз эгасини мағлуб бўлишдан сақлайди. Аллоҳнинг бу сифати «Аллоҳ кучли ва доимо ғолибdir» деган маънони англатади.

Иккинчиси – «Ҳакийм».

Ҳакиймлик сифати эса илм ва ақл билан тўғриликни топиш маъносини билдиради. Аллоҳнинг ҳакиймлиги ҳар бир нарсани бенуқсон, ҳикмат билан қилишидадир.

Аллоҳ таоло яна:

«Унинг ҳамди ила тасбих айтмаган ҳеч бир нарса йўқ. Лекин уларнинг тасбиҳини англамайсизлар. Албатта, У - Ҳалиймdir, Ғафурдир», деган (*«Исро» сураси, 44-оят*).

Аввал ҳам айтиб ўтилганидек, араб тилида тасбех айтиш «Аллоҳни поклаб ёд этиш» маъносини англатади. Ушбу ояти карима бутун борлиқ, барча мавжудот Аллоҳ таолони айбу нуқсондан поклаб тасбех айтишини таъкидламоқда.

«Унга етти осмону ер ва улардаги кимсалар тасбих айтур».

Ушбу оятнинг аввалида айтилишича, Аллоҳ таолога етти осмон ҳам тасбех айтади. Ер ҳам тасбех айтади. Ўша етти осмону ердаги кимсалар ҳам тасбех айтади, Уни поклаб ёд этади.

«Унинг ҳамди ила тасбих айтмаган ҳеч бир нарса йўқ».

Борлиқдаги ҳамма нарса ўзига хос услугуб ва ўз тили ила Аллоҳга ҳамду сано ва тасбех айтади.

«Лекин уларнинг тасбиҳини англамайсизлар».

Эй инсонлар, сизлар ғафлатда бўлганингиз учун, эътиборсиз бўлганингиз учун борлиқдаги мавжудотларнинг Аллоҳ таолога ҳамду сано ва тасбех айтишларини англамайсизлар.

«Албатта, У - Ҳалиймидир, Ғафурдир».

У ҳалиймидигидан, бутун мавжудот Уни поклаб ёд этиб турган бир пайтда ожиз инсон ширк келтирса ҳам, уни дарҳол азобламайди, қўйиб қўяди. Сермағфиратлигидан, шунча беодоблик ва гуноҳ қилса ҳам, тавба этган бандаларини мағфират қиласаверади.

Аллоҳ таоло «Раъд» сурасида:

«Ва момақалдироқ Унинг ҳамди ила тасбиҳ айтадир ва фаришталар ҳам Ундан қўрқанларидан (ҳамду тасбиҳ айтурлар)» деган (13-оят).

Ва момақалдироқ Унинг ҳамди ила тасбиҳ айтадир ва фаришталар ҳам Ундан қўрқанларидан (ҳамду тасбиҳ айтурлар). У яшинларни юбориб, улар билан йўзи хоҳлаган кишиларни, улар Аллоҳ ҳақида тортишиб турганларида, урадир. У ушлаши қаттиқ Зотдир.

Яъни момақалдироқ Аллоҳнинг амри билан У Зотга ҳамд, яъни мақтов ва тасбех, яъни поклов сўзларини айтади. Инсон момақалдироқнинг овозидан даҳшатга тушади, бу кучли овоз унга жуда қўрқинчли бир қувват бўлиб туюлади. Аслида эса момақалдироқ ўзининг Холиқига - Аллоҳ таолога ҳамд ва тасбех айтаётган бўлади. Ана шундай нарса ҳам Аллоҳга ҳамду сано ва тасбех айтганда, нима ожиз инсон айтмайди?!

«...ва фаришталар ҳам Ундан қўрқанларидан (ҳамду тасбиҳ айтурлар)».

Фаришталар Аллоҳга энг яқин - муқарраб зотлардир. Улар фақат Аллоҳга ибодат қиласидилар. Фаришталарда гуноҳ-маъсият қилиш қобилияти йўқ. Шундай бўлса ҳам, улар Аллоҳдан қўрқиб, У Зотга доимий равишда ҳамду тасбех айтадилар. Шундай экан, нима учун исёнкор, гуноҳкор инсон Аллоҳдан қўрқмайди?! Нима учун қўрқиб, Уни поклаб, ёдга олмайди?! Инсон эҳтиёт бўлиши, Аллоҳдан қўрқиши лозим. Акс ҳолда, ўзига қийин бўлади.

Аллоҳ таоло «Тоҳа» сурасида:

«Қуёш чиқишидан олдин ва ботишидан олдин Роббингни ҳамд ила поклаб эт. Кечанинг бир қисмида ва кундузнинг атрофида ҳам

поклаб ёд эт. Шоядки, рози бўлсанг», деган (130-оят).

Доимо Роббингга тасбеҳу ҳамд айт. Қуёш чиқишидан олдин ҳам, қуёш ботишидан олдин ҳам Роббингга тасбеҳ ва ҳамд айт.

Уламоларимиз «**Қуёш чиқишидан олдин... Роббингни ҳамд ила поклаб эт**»дан мурод «Бомдод намозини адо эт», «**...ботишидан олдин Роббингни ҳамд ила поклаб эт**»дан мурод «Аср намозини адо эт», деганидир», деганлар.

«Кечанинг бир қисмида ва кундузнинг атрофида ҳам поклаб ёд эт».

«Кечанинг бир қисмида ҳам Роббингга тасбеҳ айт, яъни Шом ва Хуфтон намозларини адо эт. Кундузнинг атрофида ҳам тасбеҳ айт, яъни Пешин намозини адо эт».

Демак, Аллоҳ таолони зикр қилиш ва У Зотга тасбеҳ айтишнинг энг олий мақомларидан бири намоз ўқиш экан.

«Шоядки рози бўлсанг».

«Албатта рози бўласан. Роббинг ҳам сендан рози бўлади».

Аллоҳ таоло «Тур» сурасида:

«Бас, Роббинг ҳукмига сабр қил. Албатта, сен риоятимиздасан, ўрнингдан турганингда Роббингни поклаб ёд эт! Ва кечаси ҳам Уни поклаб ёд эт, ва юлдузлар ботгандан кейин ҳам», деган (48-49-оятлар).

Дунёдаги ҳар бир иш Аллоҳнинг иродаси, қазои қадари билан бўлади. Мушрикларнинг, динсизларнинг қаршиликлари, тухмат-бўхтонларига сабр қилиш лозим, чунки булар ҳам Аллоҳнинг иродаси билан бўляпти.

Оятдаги:

«Албатта, сен риоятимиздасан» деган гап Пайғамбар соллаллоҳу алайҳи васалламнинг Аллоҳ ҳузуридаги мартабалари нақадар юқори эканини билдиради. Ҳеч бир инсон бу мақомга сазовор бўлган эмас. Ўзга Пайғамбарларга ҳам юқори мартабага далолат қилувчи сўзлар айтилган, лекин ҳеч бирига «Кўз ўнгимиздасан» деб айтилмаган. Шунинг учун ҳам қанча кўп тасбеҳ айтилса, шунча оз. Ўриндан турилганда ҳам...

«Ва кечаси ҳам Уни поклаб ёд эт, ва юлдузлар ботгандан кейин ҳам».

Демак, ҳар доим Аллоҳга боғлиқ бўлмоқ зарур.

Имом Термизий Абу Ҳурайра розияллоҳу анҳудан ривоят қилган ҳадиси шарифда Пайғамбар соллаллоҳу алайҳи васаллам:

«Ким бир мажлисда ўтириб, ҳар хил гапларни гапирса, ўрнидан туришдан олдин «СубҳанАллоҳумма! ва биҳамдиқа, ашҳаду аллаа илааҳа илла анта, астағфирика ва атубу илайка», деса, Аллоҳ ушбу мажлисдаги гуноҳларини кечиради», деганлар.

Аллоҳ таоло «Воқеъа» сурасида:

«Бас, буюк Роббинг исмини поклаб ёд эт!» деган (74-оят).

Шунча неъматларни ато қилган Парвардигори олам мушрик ҳамда кофирларнинг туҳматлари ва гап-сўзларидан покдир. Мазкур неъматларнинг Эгасини таниган ҳар бир инсон Улуғ Аллоҳ таолога тасбех айтиб, ибодат қилишга ўтади.

«Воқеъа» сурасининг охирида Аллоҳ таоло яна:

«Бас, буюк Роббинг исмини поклаб ёд эт!» деган (96-оят).

«Роббингни турли нуқсонлардан поклаб зикр қил, мақсадга етасан».

Ушбу оят тушганда, Пайғамбарамиз соллаллоҳу алайҳи васаллам:

«Ушбу оятни рукуъингизда айтинглар», деганлар.

Шунинг учун намозда рукуъга борилганда, «Субҳана Роббиял азийм» дейилади.

Бошқа бир ҳадисда Пайғамбар соллаллоҳу алайҳи васаллам:

«Ким «Субҳаналлоҳил азийм ва биҳамдиҳи», деса, унинг учун жаннатда бир хурмо экилади», деганлар.

Имом Бухорий улуғ саҳобий Абу Ҳурайра розияллоҳу анҳудан ривоят қилган ҳадиси шарифда Расули Акрам соллаллоҳи алайҳи васаллам:

«Икки сўз тилга енгил, тарозида оғир, Роҳманга суюклидир, улар: «Субҳаналлоҳи ва биҳамдиҳи», «Субҳаналлоҳил азийм», деганлар».

Уламоларимиздан бири шу борада ажойиб бир мулоҳаза ёзиб қолдирғанлар:

«Пайғамбаримиз соллаллоҳу алайҳи васаллам ушбу оятни намознинг рукуъсида ўқишимизга буюрадилар. Ҳолбуки, бу оятга етгунча бутун бошли бир сура келтирилади. Намознинг суннат амалларидан биттаси учун битта сура тўлиқ келтирилишининг ўзидан мусулмон шахс ҳаётида ва Исломнинг боқийлигига намознинг қанчалик аҳамиятли эканини билиб олса бўлади.

Яна мулоҳаза қилиш зарурки, намоз амалларидан ҳар бири биттадан сурада келган. Намознинг қиёми бир сурада, қироати бир сурада, рукуъ ва сажда эса бир неча сурада келган.

Бу эса ҳар бир амал ўзининг мустаҳкам асосига эга бўлиши зарур эканини кўрсатади».

Шайх Муҳаммад Содик Муҳаммад Юсуф

(Ҳадис ва ҳаёт китобидан)